

PAGTULON-AN 19 – ANG BUKID SA KALBARYO MILANDONG SA DALAN SA GINGHARIAN

Mateo - Marcos - Lukas - Juan

TEMA: Aron sa pagtudlo sa paghiusa sa magtotoo kang Cristo diha sa Iyang kamatayon, paglubong ug pagkabanhaw.

Nagakaduol ug nagakaduol kita ngadto sa unang tumoy sa bukid nga nakita sa mga Propeta. Kini gitawag nga BUKID SA KALBARYO. Sa ulahing pagtulon-an nato, nakita nato si Juan Bautista nga nagaandam sa dalan alang sa Hari; pinaagi sa pagtawag sa mga Israelitas sa paghinulsol ug sa pagpabautismo. Unya atong nakita ang usa ka talagsaong hitabo sa diha nga ang Manluluwas nagpabautismo sa tubig, dinhi *si Jesus nagapakita sa Iyang kaugalingon ingon nga usa sa Iyang katawhan*. Karon ato kanang makita didto sa Bukid sa Kalbaryo, nga si Cristo aduna pay laing bautismo. Usa ka bautismo nga walay tubig sama sa diha nga gibautismohan Siya ni Juan, apan usa ka bautismo ngadto sa Iyang kamatayon.

Sa wala pa Siya misulod sa Jerusalem nga nagsakay sa usa ka asno (Mateo 21:5), si Jesus nangutana sa Iyang mga tinun-an: “Sumala sa sulti sa mga tawo, kinsa man kuno ang Anak sa Tawo? Mateo 16:13-19 nagasulti mahitungod niini. Si Cristo nagtawag sa matinoohong mga Israelitas nga Iyang Iglesia, Mateo 16:18. Ang pulong “iglesia” nagapasabut *ug tinawag nga grupo*. Sa Ginghamarian, ang mga Israelitas mahimong nasud sa mga sacerdote aron sa pagdala sa mga Gentil ngadto kang Cristo nga Hari. Ang maong pinili nga grupo mahimong iglesia, ang iglesia sa Ginghamarian. Kini pagatukuron diha gayud kang Cristo, nga mao ang ulohang bato sa pamag-ang, ug si Pedro gihatagan sa yawi aron unang mag-abli sa pultahan sa pagtoo ngadto sa mga Judio.

Human si Cristo mihimo niining saad ngadto kang Pedro, Siya misugod sa pagpahayag nga kinahanglan una nga mamatay Siya, sa dili pa tukuron ang Ginghamarian, Mateo 16:21. Si Cristo naghigut sa Iyang umalabut nga pag-antus ug kamatayon ingon nga bautismo. Kini mao ang *bautismo sa Iyang kamatayon*, Lukas 12:50. Nagakaduol na ang panahon nga ang Manluluwas mag-antus na sa Iyang bautismo nga kamatayon.

Usa ka adlaw si Jesus misulti sa Iyang mga tinun-an: “Kamo nahibalo na nga human sa duha (2) ka adlaw mao na ang Pascua o “Passover” (ang paghinumdom sa PASCUA didto sa DALAN SA SAAD) magasingabut, ug ang Anak sa Tawo itugyan aron ilansang sa krus,” Mateo 26:1-2. Samtang si Jesus ug ang mga tinun-an nangaon sa piesta sa Pascua, si Jesus miingon: “Sa pagkatinuod magaingon ako, usa kaninyo magabudhi Kanako,” Mateo 26:21-25. Human sila nakaawit ug alawiton, sila nangadto sa bungtod sa Olivo. Didto sa Tanaman sa Getsemane si Jesus nagaampo nga nagaingon: “Amahan ko, kon mahimo man, isaylo lang kanako kining kopa; ngani dili sumala sa akong pagbuot kondili sa Imo,” Mateo 26:36-45.

Paghuman niini, samtang Siya nagapakigsulti pa sa Iyang mga tinun-an, si Judas Iscariote, usa sa dose (12), miabut inubanan sa bagang panon sa katawhan nga nagdala ug espada ug mga batuta nga nagagikan sa labawng sacerdote ug mga anciano sa katawhan aron sa pagdakup Kaniya, Mateo 26:47-56.

Si Jesus gidala sa atubangan ni Caipas ang labawng sacerdote, ug giakusahan ug bakak. Ang labawng sacerdote miingon Kaniya, “Nagasugo ako Kanimong pagtug-an kanamo, ubos sa panumpa tungod sa buhing Dios, kon Ikaw mao ba ang Cristo, ang Anak sa Dios?” Kaniya mitubag si Jesus, “Sumala sa giingon mo, mao ako, apan sultihan Ko kamo nga makita ra unya ninyo **ANG ANAK SA TAWO NGA MAGALINGKUD SA TUO SA GAHUM, ug MAGAANHI NGA SINAPWANG SA MGA PANGANUD SA LANGIT.**” Ug unya ang labawng sacerdote migisi sa iyang kopo ug miingon, “Nakasulti Siyag pasipala! Nganong magkinahanglan pa man kitag mga saksi. Kamo na gayud mao ang nakadungog karon sa Iyang pagpasipala.” Sila mitubag: “Siya angayan nga silotan sa kamatayon,” Mateo 26:57-68.

Ug unya si Jesus gidala ngadto sa atubangan ni Pilato, ang gobernador sa Judea, kinsa nangutana Kaniya, “Ikaw ba ang Hari sa mga Judio?” Si Jesus mitubag kaniya, “Sumala sa giingon mo, mao ako” Mateo 27:11.



Tinubdan: Sweet Publishing – kini ilustrasyon lamang sa paglansang sa krus sa Ginoong Jesu-Cristo

Unya gihuboan Siya sa mga sundalo sa gobernador ug gisul-oban Siyag kopo nga mapula. Human sila nakahimo ug purong-purong nga sampinit, kini ilang gibutang sa Iyang ulo, ug ila Siyang gipakupot ug baston nga bagakay sa Iyang tuong kamot, ug sa nagluhod-luhod sila sa Iyang atubangan sa pagbugalbugal Kaniya, sila nagakanayon, “Mabuhi ang Hari sa mga Judio.” Ug ilang gipanaglud-an Siya, ug unya gikuha nila ang baston nga bagakay ug gihapak kini sa Iyang ulo. Ug kini nahitabo sumala sa gipanagna sa mga propeta sa pag-antus sa BUKID SA KALBARYO, Mateo 27:27-30.

Pagkataudtaud, gidala Siya nila ngadto sa dapit nga ginganlan ug Golgota; nga ang kahulogan, sa Dapit sa Kalabera. Gihatagan nila Siyag bino nga sinambungan ug apdo, ug gilansang Siya sa krus. Ug sa ulo-ibabaw Kaniya, ilang gibutang ang sumbong batok Kaniya, sinulat nga nag-ingon, “MAO KINI SI JESUS, ANG HARI SA MGA JUDIO,” Mateo 27:33-37.

Dihay duha ka mga kawatan nga gilansang uban kang Jesus, usa sa tuo ug usa didto sa wala, Mateo 27:38. Usa kanila mipili sa dalan sa kinabuhi, ang usa mipili sa dalan sa kamatayon. Samtang ang usa nagapasipala Kaniya, ang usa ming-ingon Kaniya, “Jesus, hinumdumi ako kon atua Ka na sa imong Gingharian.” Ug Siya mitubag kaniya, “Sa pagkatinuod, sultihan Ko ikaw, karon kauban ka Nako sa paraiso”. Takna na kadto sa kaudtuhon (12:00) ug ang kangitngit mitabon na sa tibuok yuta hangtud sa ika tulo ng (3:00) takna sa hapon, tungod kay ang adlaw nasalipdan. Ug ang tabil sa templo nagisi ngadto sa duha ka bahin, Lukas 23:39-45. Ug sa dihang nadawat ni Jesus ang maaslom nga bino, Siya ming-ingon, “Tapus na!” Juan 19:30. Ug si Jesus mituwaw sa makusog nga tingog ug miingon, “Amahan, nganha sa Imong mga kamot itugyan Ko ang Akong espiritu.” Ug sa nakapamulong na Siya niini, nabugto ang Iyang ginhawa, Lukas 23:46. Sa dihang miabut na ang kahaponon, miadto ang usa ka tawong datu gikan sa Arimatea, nga ginganlan ug Jose, kinsa nahimo usab nga tinun-an ni Jesus. Kining tawhana miadto kang Pilato aron pangayuon ang lawas ni Jesus. Ug unya si Pilato nagsugo nga ihatag ang lawas ngadto kaniya. Ug gikuha ni Jose ang lawas ug gilimisan niya kini sa malinis nga panaptong lino. Ug gipahimutang niya kini sa bag-ong lubnganan nga kinubkob niya diha sa kilid sa pangpang. Usa ka dakung bato iyang giligid ug gisap-ong kini sa pultahan sa lubnganan, Mateo 27:57-60. Ang gisaad nga Hari patay na ug ang mga pangulo sa Israel nagahunahuna nga ila nang nawala sa hingpit si Jesus.

Usa kaadlaw milabay, ikaduha kaadlaw ug sa ika tulo ka adlaw ang atong Maluluwas nabanhaw gikan sa mga patay! Mateo 26:1-8.

Si Jesus ba angayan silotan sa kamatayon? Dili. Ang bayad sa sala mao ang kamatayon, apan si Jesus wala gayud makahimo ug sala. Mahimo Siyang mabuhi hangtud sa kahangturan, apan atong nakita:

1. Ang *atong mga sala* maoy nakapalansang ni Jesus sa krus, 1 Corinto 15:3-4. Iyang gidala ang atong mga sala ug misul-ob sa mapulang kopo sa pagpaubos aron makasul-ob kita sa kopo sa pagkamatarung.

2. Si Jesus misul-ob sa *purongpurong nga tunok* aron kita makasul-ob sa purongpurong sa pagkamatarung, 2 Timoteo 4:8.
3. Si Jesus *namatay sa atong kamatayon*. Unya Siya nabanhaw, ug karon Siya maghatag kanato sa Iyang binanhaw nga kinabuhi, Roma 6:4. Sa takna nga kita mosalig ni Jesus ingon nga atong Manluluwas, ang Espiritu Santo magabautismo kanato ngadto sa Lawas ni Cristo, ang Iglesia ni Cristo karong panahona. Ug mahimo kitang mahiusa kang Cristo ug ang Iyang bautismo nga kamatayon mahimong atong bautismo; ang Iyang paglubong mahimong atong paglubong, ug ang Iyang pagkabanhaw mahimong atong pagkabanhaw. Busa kay bag-o naman kitang binuhat diha kang Cristo, magkinabuhi kita diha sa kabag-o sa kinabuhi.

SAG-ULOHON NGA BERSIKULO: “Busa pinaagi sa bautismo, gilubong kita uban Kaniya ngadto sa kamatayon, aron nga maingon nga si Cristo gibanhaw gikan sa mga patay pinaagi sa himaya sa Amahan, kita usab managgawi diha sa kabag-o sa kinabuhi.” Roma 6:4.

PAGTULON-AN 19 – BULOHATON

Direksyon: Ang mga mosunod nga mga pahayag Tinuod ug Bakak. Pangitaa ang mga bersikulo ug isulat sulod sa parentesis ang letrang (T) kung tinuod, ug letrang (B) kung bakak.

1. () Ang mga propeta nakakita sa mga pag-antus ni Cristo alang sa atong mga sala didto sa Bukid sa Kalbaryo. Salmo 22:16.
2. () Si Cristo naghigut sa Iyang umalabut nga kamatayon nga usa ka bautismo. Lukas 12:50.

